

## Gbouŋ nba ki Pɔɔl din sɔb ki tur FILEMONN nae na

*Ki j̄in Filemonn gbouŋ na po*

Filemonn din tee wunba waa Yennu yoo kure, ki tee Kolosa doo ni Masiaweira na yeno, ki bia tee daabir nba ki bi yiu Onesimus na daano. Daabir maŋ din chiar yaat u daano boore, ki tan chet Pɔɔl dansarik ni.

Li din nyii Pɔɔl boore ki Onesimus tan teen Masiaweiro. Pɔɔl din sɔb gbouŋ na ki barin Filemonn a wun nyik chab daabir Onesimus maŋ nba ki ŋɔɔ Pɔɔl j̄into u boor na, ki li daa tee waa tee daabir nba la nyikin chab na kuukoɔ kaa, ŋaan waa mun bia tee Yiisaweiro na paak.

<sup>1</sup> Min Pɔɔl nba be dansarik ni Yiisa Masia sann paak na, nan ti naa bik Timoti-e sɔbin gbouŋ na ki teen fin ti toontunnanlɔɔ Filemonn nba ki ti loona na, <sup>2</sup> nan Masiaweira nba lakii jiantir Yennu a ŋaak ni na; ki bia teen ti niipoo Afia nan ti toontunnanlɔɔ Akipus. <sup>3</sup> Ti Baa Yennu nan ti Yomdaano Yiisa Masia ninkpabaun nan parmaasir-ii be nani.

*Ki j̄in Filemonn lomm nan u yada po*

<sup>4</sup> N naa bik Filemonn, yoo nba kur ki n tiar a po n miaru ni, n teen Yennu niipoouk, <sup>5</sup> kimaan n gbat faa teen ti Yomdaano Yiisa yada ki loon u yab kur bianjinba. <sup>6</sup> N mei Yennu, a timm nan fin nba taan ki teen Masia yada na, lin te ki tin bann

fanu binbenŋaŋ nba tee ti yar u ni na. <sup>7</sup> N naa bik, a lomm maŋ turin parpeenn nan pardoonn bonchiann, kimaan a cheen Yiisa yab kur para.

*Ki jün Filemonn daabir Onesimus po*

<sup>8</sup> Tɔn, Masia paak, n bo kii mək janmaanii nan man beta ki fan tun linba tooki, <sup>9</sup> ŋaan lomm paak ki n meia, min Pɔol nba tee saakɔɔ, ki bia be dansarik ni mɔtana Yiisa Masia paak na, <sup>10</sup> n meia ki teen Onesimus, wunba tee n bik na, kimaan maa be dansarik ni nae ki n pakɔ barŋanii na ki u teen yada. <sup>11</sup> Sinsinn, u daan tuu ki mək nyɔot ki turani, ŋaan mɔtana u ji mək nyɔot bonchiann ki teen min nan fin kura.\*

<sup>12</sup> Mɔtana, n yaa wun ŋmat a boore; ki n par kur be u ni. <sup>13</sup> N bo loon ki mii diau n boor nna na, ki wun gaar a paak ki sommin, yoo nba ki n be dansarik ni Masia barŋanii paak na. <sup>14</sup> Ŋaan n ki loon ki n mukisa kaa ki a sommimi, ŋaan n loon ki a sommin nan a mɔŋ loomme. N ki loon ki n tun siar ki li ki tee a loommi.

<sup>15</sup> Li pasiar, u yaatu na paak saa te ki a ji diau yoo kur. <sup>16</sup> Mɔtana, u ji ki tee daabir kaa, ŋaan u chee daabir: u tee ti naa bilonkake. Maa loonɔ bonchiann bianŋinba na, ŋaan a sii loonɔ ki gar nnawa, kimaan u tee a daabire ki bia tee a naa bik, ti Yomdaanɔ ni. <sup>17</sup> Li paak, li-i tee ki a mi a n tee a yɔokie, fan gaarɔ nan faa bo saa gaarin bianŋinba na. <sup>18</sup> Li-i tee ki u biira siar, koo ki u dia a pansiarie, fan te ki n pa. <sup>19</sup> N sɔbin nan n mɔŋ mɔŋ nuue na: Min Pɔol-e saa pa-a; ŋaan min kaa saa beta, a mɔŋ mi nan a dia

---

\* **1:11** 1.11 Onesimus paake tee “mək nyɔot.”

n pann a manfoor paak. <sup>20</sup> Li paak, n naa bik, sommitin ti Yomdaano paak, ki doon n par, taa tee weinanleeb Masia ni na paak.

<sup>21</sup> N sobin gbouŋ na ki teena, ki ki mək birsuk nan a saa sak tun ki lin gar maa beta linba na kura. <sup>22</sup> A bia lon diiuk ki guunin, kimaan i Yenmiaru paak, n mək dindann nan Yennu saa te ki n jen foontiwa.

### *Foontjoontii*

<sup>23</sup> Epafraŋ, wunba ki min nan ŋoo be dansarik ni Yiisa Masia paak na teena u foontii; <sup>24</sup> ki n toontunnanleeb, Mak, nan Aristakus, nan Demas, nan Luk, mun bia teena bi foontii.

<sup>25</sup> Ti Yomdaano Yiisa Masia ninkpabaŋ-ii be nani.

**Yennu Gbouj Moor**  
**Bimoba: Yennu Gbouj Moor Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

00d89ba0-4677-52d9-9bc5-aa3d7c5c966d